He hadde a book that gladly, nyght and day,
For his desport he wolde rede alway;
He cleped it Valerie and Theophraste,
At which book he lough alwey fulaste.
And eek ther was somtyme a clerk at Rome,
A cardinal, that highte Seint Jerome,
That made a book agayn Jovinian;
In which book eek ther was Tertulan,
Crisippus, Trotula, and Helowys,
That was abbesse nat fer fro Parys,
And eek the Parables of Salomon,
Ovides Art, and bookes many on,
And alle thise were bounden in o volume.
And every nyght and day was his custume,
Whan he hadde leyser and vacacioun
From oother worldly occupacioun,
To reden on this book of wikked wyves.
He knew of hem mo legendes and lyves
Than been of goode wyves in the Bible.
For trusteth wel, it is an impossible
That any clerk wol speke good of wyves,
But if it be of hooly seintes lyves,
Ne of noon oother womman never the mo.
Who peyntede the leon, tel me who?
By God, if wommen hadde writen stories,
As clerkes han withinne hir oratories,
They wolde han writen of men moore wikkednesse
Than al the mark of Adam may redresse.